

481.7

K123d

UNIVERSITY OF
ILLINOIS LIBRARY
AT URBANA-CHAMPAIGN
CLASSICS

Rezensions exemplar.

DE
INSCRIPTIONUM GRAECARUM INTERPUNCTIONE.

DISSERTATIO INAUGURALIS
PHILOLOGICA
QUAM
CONSENSU ET AUCTORITATE
AMPLISSIMI PHILOSOPHORUM ORDINIS
IN
ALMA LITTERARUM UNIVERSITATE
FRIDERICA GUILIELMA BEROLINENSI
AD
SUMMOS IN PHILOSOPHIA HONORES
RITE CAPESSENDOS
DIE V. M. MARTII A. MDCCCLXXXVII
PUBLICE DEFENDET
AUCTOR
RUDOLFUS KAISER
POSNANIENSIS.

ADVERSARIORUM PARTES SUSCIPIENT:

A. BRIEL, DR. PHIL.
O. GREIFELD, CAND. PHIL.
C. BÜRGER, CAND. PHIL.

BEROLINI
TYPIS EXPRESSIT GUSTAVUS SCHADE (OTTO FRANCKE).
Linienstr. 158.



481.7

K123d

Classics

2 F 11

ADOLFO KIRCHHOFF

SACRUM.

Inscriptionum Graecarum interpunctionem tractare ubi primum animum induxi, non defuerunt sane quae me ab eius modi incepto deterrerent deliberationes. Non enim fugit me, illud ipsum, quod quasi studium et indagatorem invitabat, dico copiam materiae, incommoda quoque et difficultates secum ferre, cum quia non facile esset tantam inscriptionum multitudinem ordinare atque sub unum aspectum subicere, tum vero quia illam copiam fere cotidie novis repertis augeri videremus. Nonne potest fieri, ut una nova inscriptione e terrae gremio ad lucem edita aliquid eiusmodi discamus, ut id quod ex copia nostra adhuc exstante collegimus falsum aut certe imperfectum esse certissimo testimonio demonstretur? Immo saepius iam factum illud esse in his studiis quis non sciat?

Tamen aliis rationibus ut rem susciperem permotus sum. Primum enim, quod apud nescio quem virum doctum aliquo loco legi, mihi quoque accidit, ut quamdiu epigraphicis rebus operam navabam ipsorum Graecorum vitae propior esse mihi viderer. Quare ille quoque studii epigraphici locus quamvis sit levidensis et exiguus ad universae Graecae antiquitatis studium, tamen indignus mihi non visus est, qui ipse per se aliquanto accuratius atque plenius investigaretur. Deinde sperabam ex veterum interpungendi usu diligenter observato fore ut quaedam indicia nanciscerer, quibus liceret inscriptionis aetatem definire ex sola eius interpungendi ratione. Quae spes quatenus me fefellerit, ipsa res docebit.

Sane inscriptionum interpunctio semel atque iterum a viris doctis tractata est, sed meo quidem iudicio non ita, ut absoluta illa quaestio dici possit, id quod inde factum est, quod partim obiter et in transcurso eam attigerunt, partim ad eum finem de ea egerunt ne in libris totam epigraphicam scientiam complectentibus ille de interpunctionis ratione locus omnino deesset. Eos enumerare convenit libros, e quibus plus minusve fructus cepi atque utilitatis.

Primus, si recte video, eam rem breviter tractavit Fridericus Osannus et in libro de Midae inscriptionibus conscripto¹⁾ et in Sylloga²⁾ sua.

Non plura dedit Joannes Franzius in suo libro sex annis post Osanni Syllogam edito³⁾.

Ex Reinachii libro⁴⁾ cuius quintum caput (p. 214 — 216) de interpunctione inscriptionum verba facit, novi quicquam me didicisse vix memini.

Hoc ipso anno demum Gustavus Hinrichsius, qui post illud tempus praematura morte scientiae nostrae ereptus est, primus aliquanto uberius illum epigraphices locum illustravit, sed ne ille quidem, quod natura eius libri⁵⁾, cui illius inserta est disputatio, ferebat, eam rem absolvit (l. l. tom. I, p. 427—431).

Quod quatenus mihi contigerit, aliorum erit iudicare.

¹⁾ Midas oder Erklärungsversuch der erweislich ältesten griechischen Inschrift von Fr. O. Leipzig und Darmstadt 1830. ib. p. 72—74.

²⁾ Sylloge inscriptionum antiquarum Graecarum et Latinarum ed. Fr. O. Lipsii et Darmstadii 1834. ib. p. 74—75.

³⁾ Elementa epigraphices Graecae. Berolini 1840. ib. p. 50/51. cf. etiam p. 98. 111. 128. 152. 375.

⁴⁾ Traité d'Epigraphie Grecque par Salomon Reinach. Paris, Leroux. 1885.

⁵⁾ Handbuch der Klassischen Altertumswissenschaft herausgegeben von Dr. Iwan Müller. Nördlingen 1886.

Obiter attigerunt interpunctionem alii viri docti, quorum libri suis locis laudabuntur, velut Boeckhius, Kirchhoffius, Schützius, Gesenius, Fabrettius.

Omnes illos libros, imprimis quos priores enumeravi, ubique cum aliquid ex eis sumpsit laudare supervacaneum esse duxi, praesertim si eiusmodi res offerebant, quae sine difficultate a quovis perspicui possunt.

Unum restat priusquam ad rem ipsam accedam ut accuratius huius disputationis fines circumscribam. Cum enim dixi „inscriptionum Graecarum“, in universum antiquas vel antiquissimas intellego inscriptiones Graecas, i. e. saeculo quarto vetustiores, eas igitur fere, quae continentur et in IGA.⁶⁾ et in CIA. I⁷⁾. Accedunt non nullae inscriptiones antiquae post illos libros editos inventae, quae in ephemeridibus editae sunt imprimis his:

1. „*Ἐφημερίς ἀρχαιολογική. Περίοδος Γ. Ἐν Ἀθήναις.*“ 1882 sqq. (= *Ἐφ. Ἀρχ.*).
2. „Bulletin de correspondance Hellénique. Paris.“ 1877 sqq. (= Bull.).
3. „Mittheilungen des Deutschen archäologischen Institutes in Athen. Athen.“ 1876 sqq. ex hoc anno sub titulo: „Mittheilungen des Kais. Deutschen archäologischen Institutes. Athenische Abtheilung.“ (= Mitt.).

Quo iure intra illas antiquiores tantummodo inscriptiones versata sit quaestio, ex hac ipsa apparebit.

Disposui disputationem ita, ut primo capite agam de interpunctionis signis, secundo de ratione et usu interpungendi; tertio denique conatus sum quid de historia interpunctionis adhuc effici possit breviter exponere, quamquam in hac quoque re idem valet,

⁶⁾ Inscriptiones Graecae antiquissimae praeter Atticas in Attica repertas, Berolini 1882. ed. Hermannus Roehl.

⁷⁾ Corpus inscriptionum Atticarum. Volumen primum. Inscriptiones Euclidis anno vetustiores ed. Ad. Kirchhoff. Berolini 1873.

quod de historia alphabeti Graeci professus est A. Kirchhoff, cum diceret in praefatione libri sui notissimi („Studien zur Geschichte des griechischen Alphabets“ Berlin 1877³. = Stud.): „eine ‘Geschichte des griechischen Alphabets’ zu schreiben, halte ich die Zeit für noch nicht gekommen, und es widersteht mir, die Lücken unseres Wissens durch hypothetische Constructionen da ausfüllen zu wollen, wo eine vollkommene oder theilweise Ergänzung durch Thatsachen der Erfahrung im Bereiche der Möglichkeit liegt und in nicht zu ferner Aussicht steht.“

CAPUT I.

De signis interpunctionis.

Duo imprimis reperiuntur signa interpunctionis inde ab antiquissimis temporibus, nempe punctum duplex (:), et punctum triplex (:), ita utrumque dispositum, ut alterum super alterum punctum ponatur. Quarum duarum formarum utra sit antiquior, utra recentior, si quaerimus, valde miramur Augustum Boeckhium, cuius viri de rebus epigraphicis merita mea laude non indigent, eam sententiam protulisse, ut diceret (Oec. civ. Ath.¹ II, p. 251 et iterum ² II, 125) Atticas imprimis inscriptiones spectans: „In den ältesten Inschriften findet man gewöhnlich 3 Punkte (:), in den späteren nach Euklid 2 (:)" etc., cum ipse praeter alias edidisset inscriptionem CIG. 150 constanter utentem binis punctis (cf. ib. nr. 70. 140; contra nr. 218. 214. 456 h. 560 alias, quae Euclidis anno recentiores ternis punctis utuntur). Quae recte non esse iudicata intellexisse videtur Osannus, qui tamen nimis caute loquitur (in Mida p. 73): „Wenn diese Bemerkung in Bezug auf den Gebrauch der Attiker im Allgemeinen gegründet sein mag: so glaube ich, dass

sie in nichtattischen schon grosse Einschränkung erleide, nicht insofern, als ob die Bezeichnung : nicht älter sei als :, sondern dass der Gebrauch von : bei Nichtattikern älter sei als die angegebene Epoche des Archon Eukleides“ etc., quam sententiam quibusdam exemplis probat. Ne Franzius quidem, quamquam ipse (El. epigr. p. 98) iam olympiadi octogesimae duo vel tria puncta tribuit, Boeckhii iudicium refellit, nisi quod dicit (l. l. p. 51) „non sine exceptione“ verum esse. Hodie, cum multo maiorem antiquarum inscriptionum copiam habemus, dubitare iam non quimus, quin et ante Euclidem et post eum promiscue duplex triplexque punctum usurpatum sit. Suo igitur iure Adolfus de Schütz (in dissertatione de historia alphabeti Attici. Berol. 1875. p. 20) illo interpunctionis discrimine ad Atticarum inscriptionum definiendam aetatem usus non est (cf. Hinrichs. l. l. p. 428). Videmus enim, ut paucis utar exemplis, Sigeensis lapidis (IGA. 492b) titulum Atticum, qui medio saeculo sexto adscribitur, duplex eundemque triplex usurpare punctum, eadem interpungendi ratione uti titulum Salaminium (Mitt. IX, 117) eiusdem saeculi, videmus inscriptionem nuper repertam, quae IIGA.¹⁾ XXXI, 21 repetita est, quaeque ob loci quo inventa est naturam ante olymp. 75, ob litterarum ϵ , μ , ν formam certe multo prioribus temporibus scripta est, illam igitur inscriptionem constanter per bina puncta interpungere. Et quamquam meri numeri non multum prosunt, tamen addam, earum inscriptionum Atticarum quae omnino interpungant eam esse rationem, ut ca. octoginta binis utantur punctis, ternis ca. septuaginta: apparet igitur per duo puncta interpungentes titulos numero superiores esse eis qui tria puncta ad distinguendas voces exarata habent.

¹⁾ Images inscriptionum Graecarum antiquissimarum in. us. scholl. comp. H. Roehl. Berol. 1883.

Fere idem valet de ceterarum Graeciae regionum inscriptionibus antiquis. In his quoque neutra forma vetustior esse dici potest. Duplex enim punctum incisum exhibent tituli Elei antiquissimi (IGA. 110. 111. 113, cum recentior ille IGA. 119 triplici puncto utatur); titulus Locrensis IGA. 322 ab altera manu terna, ab altera bina puncta exarata habet, quam utramque manum eadem fere aetate scripsisse conceditur; titulus Sigeensis Ionica dialecto utens (IGA. 492a) binis punctis distinguit. Reliquas iam enumerò inscriptiones eiusdem libri, quarum per bina puncta fit interpunctio: IGA. 323. 349. 354. 372 (, 19. 56. 113. 348.) 397. 497. 498. 502. 511. 552. 567. 587. Omnino in viginti inscriptionibus inveniuntur bina puncta, cum terna puncta usurpent viginti octo inscriptiones, ergo non ita multo plures. (In IGA. 68a et 342 non dubito, quin duplex punctum statuendum nullum sit; ubi hodie in imaginibus cernitur temporum iniuriis ex triplici mutilatum esse censeo).

Iam nonnullae supra occurrebant inscriptiones, quae et bina et terna puncta habent ab una eademque vel a diversis incisa manibus. Quaeritur quoniam ex constanti sive duplicis sive triplicis puncti nihil de aetate tituli colligi posse vidimus, num melius aetatis indicium sit utraque forma promiscue adhibita. Dolendum est, ad hanc rem diiudicandam materiae copiam adhuc exstantem non sufficere, nam maxima pars earum inscriptionum, in quibus enumerandis uberrimus est Hinrichsius (l. l. p. 428/29), alteram quidem interpunctionis formam (i. e. aut duplex aut triplex punctum) fere constanter adhibent, altera autem rarius utuntur, quam ut sive per lapididae negligentiam atque errorem insculptam sive temporum iniquitatibus laesam sive falso lectam eam esse putare vetemur. Restant titulus Sigeensis et titulus Locrensis (IGA. 492b et 322b), quo in utroque idem factum est, ut titulo ab alterius scribae manu exstanti

novum titulum sive novam tituli partem alter scriba subiungeret. Fortasse haud absurdum est existimare, eum, qui prioris lapicidae titulum ante oculos habuerit, huius interpungendi ratione permotum esse, ut licet nesciens atque invitus suo titulo aliquot interpunctionis signa a suo ipsius usu aliena insereret. De Locrensi quidem titulo, ubi ad interpunctionis varietatem accedit scripturae differentia, sine dubio recte censuit Kirchhoffius, cum titulum aetati cuidam tribueret, qua altera forma in desuetudinem abire, altera in usum venire coepit („einer Uebergangsperiode“ Stud. p. 136). Quod num in universum de interpunctione sola dici possit, novae inscriptiones repertae fortasse edocebunt. Non omittam hoc loco dicere, mixtum illum interpunctionis usum occurrere in inscriptione nuper reperta in Lemno insula (Bull. 1886 p. 1 sqq.), quae tamen Graecis quidem literis, non tamen Graece sed dialecto quādam barbara adhuc ignota scripta est, quod eo magis est dolendum, quia antiquissimam eam esse primo aspectu apparet.

Comprehendo, quae ex hac disputationis parte sequuntur: Ex adhibitis ternis aut binis punctis de aetate incriptionis colligi nihil potest; ex ternis et binis punctis in una eademque inscriptione adhibitis quid de aetate eius colligi possit, nondum liquet.

Inter duplex et triplex punctum quamquam fere stat distinctio inscriptionum Graecarum, ita ut haec duo signa proprie Graecae interpunctionis signa vocari possint, tamen non desunt alius figurae notae, ad quas tractandas iam transeo.

Ac primum quidem eam notam memorabo, quae quibusdam locis constantia aliqua usurpata est: dico hastam sive lineolam directam, quae imprimis Cretensium propria est titulorum, praeter hos invenitur in uno ex Theraeis et in uno titulo Laconico Gereniae reperto. Usus illius notae plane idem est atque punctorum. In-

scriptionum illa forma ad distinguendum utentium copia haec est: IGA. nr. 64. 449. 478. 479. 480, ad quas accedunt nuper editae: Bull. 1885 p. 3 sqq. nr. 4. 6. 7 et nuperrime inventa Mitt. 1886 p. 180 (neque enim in hac inscriptione hastam litterae iota variam formam esse ei, qui eam edidit, antea concedo, quam talem longi et brevis iota differentiam in scriptura significatam esse certiore documento probatum sit, quamquam ego quoque mutilatum illum titulum explicare non posse me facile confiteor¹⁾). Omnes hae inscriptiones litterae iota aliam formam tribuunt, excepto uno Gerenio illo titulo (IGA. 64), qui eadem nota ter ad iota litteram significandam, bis ad distinguendas voces utitur.

Ab hoc loco non alienum puto admonere, eandem lineolam licet alia interpunctionis vi adhibitam occurrere in antiquissima illa inscriptione Phoenicia sive potius Moabitica, quae Mesae lapidi incisa est (*Revue archéol.* 1870. tom. XXI tab. 8, p. 183 sqq.), ita enim ut voces singulae simplici puncto, sententiae autem („les versets“) lineola distinguantur. Quae duplex interpunctionis ratio in uno eodemque titulo in inscriptione Graeca adhuc nulla comparuit. Sed quoniam infra locus dabitur uberius de hac re disserendi, eam hic leviter attigisse satis habeo. Non casu factum videtur, quod certis finibus hastae pro interpunctione adhibitae usus circumscriptus est, nempe Cretae et Therae insularum finibus. Ad quas accedit unus ille quem memoravi titulus Laconicus Gereniae inventus. Fortasse alius quoque Laconicus huc referendus

¹⁾ Idem sensit Comparetti, qui nuperrime permultas inscriptiones Creticas ab Halbherrio inventas edidit (*Museo Italiano di antichità classica* vol. II punt. I. 1886. p. 129—178 et 181—252). Ille vir doctus de supplendo quoque titulo recte iudicasse mihi videtur (l. l. p. 175). Kirchhoffii, quem eandem sententiam protulisse audio, librum (i. e. „*Studiorum*“ editionem quartam) nondum mihi contigit ut inspicerem.

est: IGA. 54, qui interpunctionem (si licet hoc vocabulo uti) exhibet ad formam litterae sigma lunatae (. Denique Mycenaei tituli (IIGA. XXIX) interpunctionis signum (]) aliquam cum illis habet similitudinem. In universum dici potest, hastam eo tempore, quo iota litterae in illis regionibus vulgaris forma Ionica tribueretur, non iam potuisse ad voces distinguendas adhiberi, nam id quod in titulo Gerenio factum est saepius factum esse verisimile non est.

Iam pauca verba faciam de puncto simplici, quod iam in Mesae lapide incisum esse vidimus. Res est admodum mira, interpunctionem per unum punctum factam in Graecis inscriptionibus non inveniri nisi in tribus eisque non in Graecia ipsa repertis. Sunt hae: IGA. 509 inscriptio inventa Syracusis in Ortygia¹⁾, IGA. 544 titulus Achaicus „haud procul a Crotone repertus“, IGA. 526 titulus ad Iapygium promunturium repertus alphabetum Tarentinum continens, quamquam in hoc titulo ex Cepollae solius schedis noto dubium est punctane illa in lapide ipso insculpta sint an in apographo addita ad litterarum intervalla indicanda. Hi igitur tres (sive duo) tituli soli simplici puncto utuntur et, uti dixi, non in Graecia ipsa sed in coloniis Graecis occidentalibus reperti sunt. Osannus ita existimat de illo simplicis puncti usu (Sylloge p. 74): „Uno puncto singulis vocabulis interserendo, ut apud Etruscos et Latinos moris fuit, Graeci veteres usi esse non videntur“ et alio loco (Midas p. 74): „Was in der Sylloge a. a. O. von dem Gebrauche eines Punktes gesagt worden, dass er der älteren griechischen Schrift nicht eigen sei, er-

¹⁾ Siquidem hic simplicia puncta statuenda sunt, cum negari nullo modo possit ob marginem superiorem detritum, olim bina puncta exarata fuisse. Ceterum hic et alias si proprie dicimus non puncta sed parvi circuli incisi sunt (cf. IGA. 42. 323, CIA. 526). Interdum in mediis circulis puncta collocantur, velut CIA. 333.

leidet keinen Widerspruch durch die als der Gräcität angehörend erwiesene Inschrift von Petilia, auf welcher hinter jedem Worte ein Punct steht, da Boeckh (CIG. 10) von dieser Inschrift selbst sehr wahr sagt, dass dieser Gebrauch „in Italico monumento“ nicht zu verwundern sei.“ Quam sententiam Hinrichsius, ut ego video (l. l. p. 429) et Reinachius (l. l. p. 215) probaverunt. Quorum iudicia in medium protulisse hoc loco satis habeo, cum de ea re plura verba facturus sim in huius disputationis capite tertio (p. 35 sqq.), ubi de historia Graecae interpunctionis agetur.

Restat, ut brevem subiungam earum inscriptionum enumerationem, quae singularibus interpunctionis formis utuntur. Rarae enim atque sparsae inveniuntur eiusmodi distinctionis notae, ut non mori atque usui cuidam, sed merae lapidicae licentiae deberi putandae sint.

Tres hastae transversae (\equiv) pro totidem punctis clare cernuntur in inscriptione ἀλτῆροι plumbeo incisa (Ep. Arch. 1883 p. 189 sqq.), cuius materiae natura sine dubio caussa erat, cur scribae magis placeret hastas imprimere. Minus perspicue eadem hastae leguntur in inscriptione CIA. 341 mutilata et fracta, et in inscriptione illa Boeotica Delphis reperta (IGA. 165), quippe quae solis Dodwelli schedis servata sit. Mirae sunt duae lineolae curvae (\asymp) ansae aeneae paterae praeter vulgare punctum duplex incisae, item duae hastae directae (\parallel) in glande plumbea (IGA. 571), magis etiam mirae in inscriptione Attica (CIA. 140 v. 26) quattuor transversae lineolae (\equiv): eam vero constanter adhibitam esse interpunctionis formam, quam Fourmonti schedae exhibent in inscriptione Attica, nunc CIA. II, 2, 824 repetita, veri minus simile esse videtur, quam ut non opiner, illa signa a Fourmonto ipso, in talibus rebus levidensibus sine dubio haud diligenti, esse apposita,

quibus vacua spatia numerorum signa ab utraque parte includentia indicarentur.

Paullo frequentiores sunt eae interpunctionis formae, quae ex pluribus quam tribus punctis constant.

Quattuor puncta sic disposita (:) bis leguntur in titulo Ionico Dodonae reperto (IGA. 502) praeter duplex et triplex punctum, constanter exarata sunt in titulo Argivo (IGA. 39), sed hic quoque Fourmonto cui soli illa inscriptio debetur, non magnam fidem habemus (cf. Osannum in Mida p. 72, Hinr. l. l. p. 429, qui iure in Midae titulis sepulcralibus eadem quattuor puncta clare videri admonent). Utut illa res se habet, sane ea quae fit per punctum quadruplex interpunctionis forma singularis est.

Quattuor puncta in hunc modum disposita (::) inveni CIA. 31 v. 26. ib. 324c v. 23. CIA. II, 1, 175 et in his quidem titulis omnibus ad orationis aliquam partem finitam indicandam.

Quinque puncta ad quincuncis figuram collocata (:::) videmus in CIA. 324 v. 63; CIA. II, 2, 677. 1053 post sententiam finitam, CIA. II, 1, 17b (Add.) inter nomina propria, CIA. II, 2, 674 post signum numeri posita.

Sex puncta (::::) legit Hicksius (Ancient Greek Inscriptions in the Brit. Mus. P. I) in inscriptione Attica nunc secundam eius collationem repetita CIA. IV, 531. Eadem interpunctionis forma redit post sententiam finitam CIA. II, 2, 652 v. 18.

Denique novem puncta exarata sunt in CIA. 18 in inscriptione admodum mutilata, CIA. II, 2, 653 ter inter nomina propria, bis in inscriptione Attica vetustiore (Bull. 1880 p. 225), ubi alterum exemplum inter duo vocabula, alterum in medio vocabulo ita positum est, ut per errorem insculptum esse clarum sit.

In his quas laudavi inscriptionibus singulari illa

interpunctione plerumque sententiae finem indicatum esse memorabile est.

Iam ad finem huius capitis perveni, nisi quod addam, id quod nos facere solemus ad voces separandas, nempe ut vacua spatia relinquamus, in lapidibus Graecis non exhiberi, quod in libris manu scriptis admodum serae aetate in usum venisse constat. Tamen illius rationis simile aliquid non deest: numerorum enim signa ab utraque parte non interpunctionibus solum sed etiam spatiis vacuis circumdari saepius videmus. De quo usu alias nonnulla verba faciam (cf. p. 22).

CAPUT II.

De usu interpunctionis.

Huius capitis duae erunt partes, quarum altera qualis sit interpunctionis usus, quantus sit altera exponetur.

Ac primum si quaerimus qualis fuerit usus interpunctionis, h. e. qualem vim habuerit interpunctio, ad quem finem apposita sit, Graecorum morem toto coelo quasi distare a nostratum consuetudine facillime intellegitur. Nos enim, quoniam vocibus ipsis aliquod spatium vacuum interponere consuevimus, interpunctionibus non utimur nisi ad sententias vel enuntiata distinguenda: Graecae inscriptiones, quae quidem omnino interpungant, ideo hoc faciunt, ut facilius dignoscatur, ubi altera vox terminetur, altera incipiat. Eodem igitur nomine appellamus duas res valde inter se diversas, optimo iure tamen, quoniam nomen illud utrique profectum est ex signo, quo utraque eodem utitur: punctis inter maiores sive minores orationis partes inter-

positis. Nostrorum enim librorum interpunctio primo fit per puncta sola, nullis adhibitis lineolis, quae puncta ex diversa ad litterarum altitudinem collocatione diversam vim habent: quae interpungendi ratio aliquot saeculis post Christum natum orta est (Wattenbach „Anleitung zur griech. Paläogr.“). Sed redeamus ad Graecarum veterum inscriptionum rationem interpungendi. Si igitur voces tantummodo apud Graecos distinguebantur, at has certe constanter eos distinxisse existimamus: quod tamen rarissime factum esse nullo negotio observari potest. Tantum enim abest, ut omnes inscriptiones in hac re aliqua constantia utantur, ut contra maxima earum pars incredibilem quandam inconstantiam atque licentiam exhibeant, ex qua clare apparet, illam rem nullo legis vinculo teneri, immo vix usui atque consuetudini alicui obtemperare. Sed quatenus omnino interpunctio adhibita sit in titulis Graecis quoniam huius capituli parte altera enarrabitur, hic satis habeo aliquot exemplis e magna materiae copia electis Graecarum interpungendi usum ac rationem, quam modo breviter descripsi, paullo accuratius illustrare.

Et constantia interpunctionis et tituli ipsius amplitudine omnibus praestat lapis ille, qui „Teiorum diras“ incisas exhibet (IGA. 497), qui totius huius quaestionis fundamentum esse potest. Sane eius traditio non eadem est praestantia, qua ipse titulus, cum maior pars B non iam exstet neque debeatur nisi proximi saeculi virorum doctorum apographis, sed partem A si solam haberemus, plane idem sciremus, cum B novi quicquam vix afferat. Hic titulus ea utitur ratione, ut inter singulas voces interpunctionem et duplex quidem punctum interponat, ita tamen ut quaedam orationis particulae cum insequenti nomine artissime coalescant. Haud ab re erit, totam partem A cum interpunctionis signis, litteris minusculis transscriptam apponere.

- „οσις : φάρμακα : δηλητή-
 ρια : ποιῶ : ἐπιτηίοισι-
 ν : τοξυνὸν : ἡεπιδιώτη : κ-
 ἔνον : ἀπόλλυσθαι : καια-
 5 υτὸν : καιγένος : τοκένο :
 ὅσις : ἐςγῆν : τηνητήην : κ-
 ωλλῖοι : στίον : ἐςάγεσθαι :
 ἡτέχνη : ἡμηχανῆ : ἡκατ-
 αθάλασσαν : ἡκατήπειρο-
 10 ν : ἡεσαχθέντα : ἀνωθεοίη : κέν-
 ον : ἀπόλλυσθαι : καιαντ-
 ὸν : καιγένος : τοκένο“

v. 2 videmus praepositionem (ἐπὶ) non separatam esse a nomine (Τῆτοισιν), quod redit v. 6 ἐςγῆν; v. 3 articulus coniungitur cum nomine (τοξυνὸν), idem fit v. 5 τοκένο i. e. τὸ κείνου, v. 6 τηνητήην i. e. τὴν Τῆτην, v. 12 iterum τοκένο; particula ἡ cum sequenti vocabulo coalescit v. 8 ἡτέχνη i. e. ἡ τέχνη, ib. ἡμηχανῆ i. e. ἡ μηχανῆ, v. 10 ἡεσαχθέντα i. e. ἡ ἐσαχθέντα; denique post καὶ deest interpunctio v. 4/5 καιαντὸν i. e. καὶ αὐτὸν, v. 5 καιγένος i. e. καὶ γένος (cf. v. 11 et 12). Sed duae quoque eiusmodi voculae nomini ita praeponuntur, ut neque inter se neque a nomine interpunctione separantur: v. 3 ἡεπιδιώτη i. e. ἡ ἐπ' ἰδιώτη, v. 8/9 ἡκαταθάλασσαν i. e. ἡ κατὰ θάλασσαν, v. 9/10 ἡκατήπειρον i. e. ἡ κατ' ἥπειρον. Addam ex partis B v. 35/36 ὅσαντιαστήλας i. e. ὅς ἂν τὰς στήλας et v. 30/31: μῆποιήσεαν i. e. μὴ ποιήσεαν, ubi ἂν et μὴ particulas eadem ratione adhibitas videmus. v. 35 etiam post ὅς interpunctio deest, quae ponitur v. 36 post ἐνῆσιν i. e. ἐν ἡσιν: priore loco ob ὅς vocis brevitatem interpunctionem omisisse scribam licet conicere.

Habemus igitur in hoc titulo interpunctionem quam potuit fieri maxima constantia adhibitam. Nam praepositiones illae, articuli, particulae, quas ab insequentibus

verbis distinctione non separatas videmus, ne poterant quidem separari, cum per suam ipsarum naturam vim vocum integrarum propriam non habeant neque quidquam significant nisi cum aliis verbis artissime coniunctae. In universum igitur statuere licet, eam esse rationem, ut omnes illae voculae encliticae atque procliticae interpunctione a nominibus suis non seiungantur.

Eadem quae in Teio lapide cernitur ratio redit in „aere Petiliensi“ IGA. 544, ubi bis tantummodo deest interpunctio, v. 2/3 *τανΓοικίαν* et v. 3 *καιᾶλλα*, ob easdem, ut videmus, caussas, quas in illo titulo. Reliqui tituli, qui tantae sunt amplitudinis, ut certo de eorum usu statui possit, eadem interpungendi constantia non utuntur, ne Eleus quidem (IGA. 111) aut Locrenses (321. 322) aut Ephesius (IGA. 499) aut Sigeensis (IGA. 492), quare eos singillatim hic tractare omitto. In inscriptionibus unum vel duos versus comprehendentibus saepius inveneris constantem usum: laudo titulum Atticum IGA. 5: *ἈθENAῖοι : ἀποπελοπον[ν]εσίον : ναυμαχία : νικέσαντες : ἀ[νέθεσαν] ἀπὸ* (post *Πελοποννησίων* quamquam unum tantum punctum hodie conspicuum est, sine dubitatione tria puncta in textu posui); titulos Argivos IGA. 42: *Ἄριστος : ἐποίεε : Ἀργεῖος | κἀργειάδας : ἀγελαίδα : τἀργείο*; IGA. 43a in rota aenea: *τοιΓανάκοι : ἐμὶ : Εὐδ . . . ς : ἀνέθεκε*; titulum Aegineticum IGA. 359: *Γλανκίας : Αἰγινάτας : ἐ[π]οίεσε*; titulos Ionicos IGA. 498b: *Μίκων : ἐποίησεν : Ἀθηναῖος*, IGA. 502: *Τερψικλῆς : τωδὶ : Ναῦφ : ραιψωδὸς : ἀνέθεκε*.

Ex his exemplis satis apparet, quid sibi velit Graeca interpunctio, quatenus a nostro usu discrepet atque abhorreat.

Tamen non omnino desunt inscriptiones, quae interpunctionem semel vel bis ita posuerint, ut sententiae finis ea significatus sit. Quas quamquam diversissimis locis scriptae sunt atque temporibus, ut non tam mori

atque usui quam casui deberi illas interpunctiones manifestum sit, tamen in unum locum congerere operae pretium mihi videtur.

Primo loco conferam nonnullas inscriptiones formae metricae compositas, in quibus inter binos versus vel semel vel saepius interpungitur. Quod factum esse videmus in titulo Coreyraeo (IGA. 342), ubi meo iudicio olim interpunctiones per tria puncta factae post quemlibet versum positae fuerunt; v. 2 enim post *σᾶμα* interpunctionem integram, v. 5 ante *Πραξιμένες* unum ex tribus punctum interisse existimo. Quod in hoc titulo etiam post ultimi versus finem interpunctio conspicitur, non iam mirabimur, si quam ad formam in monumento illo sepulchrali incisa fuerit inscriptio meminerimus.

Eiusdem generis interpunctio semel cernitur in titulo Argivo IGA. 37 v. 2—7: *Αἴσχυ[λ]λο[ς] Θίοπος τοῖς δαμοσίοις ἐν ἁέθλοις : τειράκι τε [σ]πάδιον νίκε κα[ι] τρὶς τὸν ὀπλίτ[αν]*, in titulo Abderitano (?) ib. 349, in Erythraeo ib. 495. Adde ex CIA. I. nr. 333. 463. 467. Facile intellegitur, quam ratione ductus lapicida titulis illis in duorum versuum confinio signa inseruerit, cum ad eam quam in universum praebebat scriptura continua difficultatem legendi ea accederet, quae orta est inde quod ex metricae formae rithmo legenda erat inscriptio. Maiorem sane commoditatem legendi et scandendi versus efficere potuit, si metrici versus initium inscriptionis quoque novi versus initium esse iussisset, id quod alias factum esse videmus, sed in universum a tali scribendi modo scribam prohibebat ratio et parsimoniae et symmetriae habita.

Sparsim eadem interpunctio occurrit in titulis prosa oratione scriptis, et est quidem saepe singularis formae illa interpunctio, velut CIA. I, 18 novem puncta, CIA. I, 31 v. 26 quattuor puncta, CIA. 140 v. 20 sqq., ubi saepius nomina propria interpunctione distinguuntur (ubi

nos commata ponere solemus), semel quattuor hastis transversis sententia clauditur. Adde CIA. I, 25 v. 5; 57 b v. 7; 59 v. 14; 282 v. 7; 324 v. 63. CIA. II, 1, 75 v. 7; II, 2, 652 (sex puncta); 1053. His omnibus exemplis probatur, ne apud Graecos quidem defuisse, qui eiusmodi post enuntiati finem positam interpunctionem optimum subsidium ad legendi facilitatem atque commoditatem esse sentirent, sed eisdem ipsis exemplis docemur Graecos, quamquam tale legendi adminiculum non ignorarent, tamen rarissime eo usos esse in inscriptionibus. Quibus de caussis hoc fecerint exponere non huius loci est; tantum dico caussam sine dubio eandem fuisse atque eius inconstantiae, quam in vocum inter se separandarum usu cernimus. In universum de hac re nonnulla verba facere in animo est in tertio capite.

Prorsus diversum genus interpunctionis si quidem interpunctionis nomine omnino licet significari, frequentissimum in titulis Graecis, imprimis Atticis, invenitur, quo numerorum signa sive sigla, quo facilius dignoscerentur neque pro litteris haberentur, ab utraque parte interpunctionis notis circumdabantur. Antiquissimis temporibus sane, cum numeralia integra litteris scribebantur, non opus erat illa distinctione aut certe non magis opus erat, quam in ceteris orationis vocibus. Ubi autem siglis, quae ipsa prorsus retinebant litterarum formas (ΜΧΗΔΓΙΤ), numeri significari coepti sunt, id quod Herodiano quidem teste (*περὶ τῶν ἀριθμῶν* cf. Reinach. p. 219) a Solone iam factum est in nummis signandis, illa sigla a ceteris vocibus separare saepe ex re visum est lapicidis. Et plerumque quidem, ut dixi, utrimque numeralia interpunctionis signis includebantur, sed nonnullorum titulorum disponendi et ordinandi ratione factum est, ut ex altera parte posita interpunctio sufficeret, cum ex altera vacuum spatium esset, eos titulos intellego, qui columnis disponi ac scribi solebant, ut tri-

butorum catalogos. Sed ne illius quidem interpunctio-
nis usus sibi constat, immo permultae inscriptiones ce-
teris verbis numeralia nullis signis distincta inseruerunt.
Sed tamen hic usus diutissime permansit atque viguit
et Romana quae dicitur aetate demum disparuit. CIA.
II, 1 et 2 innumerabilia eius exempla exhibent. Alia
ratione utuntur eae inscriptiones, quae ab utraque parte
numeralium signorum spatium vacuum relinquunt, qui
usus quarto saeculo frequens est, sed etiam quinto non
deest (Hinrichs p. 433; adde CIA. I, 138. 189b). Haec
igitur ratio prorsus eadem est, quam nos ad vocis distin-
guendas usurpare solemus.

Nonnulla cuiusvis rationis exempla afferam. Utrim-
que interpunctio posita est CIA. 188, e. g. v. 24:

ΞΙΤΟΝΗΠΡΟΙΣ : ΤΤΤΤ :

Eiusdem lapidis latus aversum (189) in parte inferiore
interpunctione prorsus vacat, velut v. 16:

ΔΙΟΒΕΛΙΑΝΡΗΙΙΣΕΛΛΕΝΟΤΑΜΙΑΙΞ sqq.,

qualis scripturae ambiguitas manifesta est; contra in su-
perioris partis prioribus versibus spatiis vacuis numeros
includit, velut v. 9:

ΔΙΟΒ]ΕΛΙΑΝ ΤΤΙ ΛΟΛΙΞΤΑΙ sqq.

Binis punctis utrimque utitur CIA. 123, velut v. 6:

ΑΡΛΥΡΑΙ : ΗΔΔΙ : ΞΤΑΘΜΟΝ sqq.

A sinistra parte sola adiecta est interpunctio CIA. 226,
nr. 4, velut v. 4:

ΔΙΟΞΕΡΙΤΑΙ : ΔΡΗΙΙΙ spat. vac.

quo numerali signo columnae versus finitur, ita ut cum
insequenti nomine misceri non potuerit. Eadem de
caussa nisi a dextra parte non posita est interpunctio
CIA. 197 v. 11 et 14. In illis catalogis in universum
raro interpungitur, quod nullo modo mirum est, cum
ipso loco quem in columna obtinebat numeri signum,
tale signum esse extemplo intellegi posset.

Restat ut dicamus de ea interpunctione quae vo-

cem abbreviatam h. e. non perscriptam, per compendium scriptam esse indicat. Ille usus sane non frequens est in vetutioribus titulis (CIA. I), tamen aliquot exemplis probari potest. CIA. 321 v. 3: ΑΛΡΥΛΟΙ : ibidem v. 17 idem compendium, sed utrumque numerale signum excipere videtur. Certius eiusmodi interpunctio cernitur CIA. 338 v. 3 ΚΑ[Θ]ΥΓ : ΑΓΡΥΛΕΗΞΚΑΘΥΓ : et v. 4 Τ]ΙΜΟΚ : . Multo frequentior ille usus est in inscriptionibus quinto saeculo recentioribus cf. Reinach. p. 226 et Hinrichs. p. 434/435, qui in universum de scripturae compendiis agunt).

Atque intra illas duas rationes, nempe alteram qua numeralia, alteram qua compendia indicantur, fere stat interpunctionis usus in titulis saeculo quinto inferioribus. Tamen ne proprie quidem quae dicitur interpunctio prorsus illi aetati deest, sed novi nihil nos docet, quare illas inscriptiones uberius hic tractare nihil attinet.

Ne quid huic parti desit, interpunctiones nonnullas per errorem positas afferam. IGA. 321 interpunctio in media voce collocata est, ita ut legatur v. 7: καταλείπον: τα (v. Hinrichs. p. 427), et in eodem titulo v. 1: Αοκῶν τῶν: Ὑποκναμιδίων sine dubio falso scriptum est pro Αοκῶν: τῶν Ὑποκναμιδίων. (De huius tituli interpunctionibus paragraphorum signa includentibus, quas cum numeralium distinctione comparare licet, cf. Hinrichs. p. 432 § 100). Fortasse in vocibus Ὀποντίον: τεχλίον quoque (v. 39) interpunctio scribae negligentia atque incuria sola post Ὀποντίον posita est pro Ὀποντίοντε: χλίον, cum τε particula per ipsius suam naturam cum praecedenti nomine artissime coniungatur. Huius generis errores sine dubio multi colligi possunt, sed haud scio an negligenti atque inconstanti serioris cuiusdam aetatis usui quam errori eiusmodi res tribuere praestet. Huc referenda est scriptura tituli Attici (CIA. 433 v. 2) ita exarata:

EN ΤΟΙ: ΠΟΛΕΜΟΙ

vel CIG. 34 ἐπὶ: νίκη, vel IGA. 499 v. 5 ἐγ δὲ: τῆς ἀρι-
 στ[ερω]ς, ubi accedit, quod saepius post δὲ interpungitur.
 Manifestus error est in χ: συνάρχοντες (cf. Hinrichs.
 p. 427 § 90). In titulo Eleo aliqua cum constantia in-
 terpungente v. 3 post vocem ΤΟΙ, i. e. τοῖ = τοδὶ, in-
 terpunctionem deesse mirabamur, nam ex universo illius
 inscriptionis usu hoc loco exspectare eam licebat. Quae
 exspectatio quam vera fuerit, nunc probatur illius tabu-
 lae recenti editione a Newtonio facta („Ancient Greek
 Inscriptions in the British Museum P. II. tab. I fig. 3),
 in qua ea quae desiderabatur interpunctio clare conspicitur.
 Dignum illud mihi visum est, quod memoraretur, quia
 in his rebus ad interpunctionis usum spectantibus con-
 iectura aliquid assequi difficillimum esse mihi persuasi.

Iam ad alteram huius capitis partem transeo, qua
 quantus fuerit interpunctionis usus accuratius in-
 quirere in animo est. Habemus inscriptiones aut con-
 stanter interpungentes aut interpunctione carentes. Ex-
 poni oportet, quantum ex poni potest, quibus temporibus
 interpungi coeptum, quibus desitum sit; quibus locis fre-
 quentissimus, quibus rarissimus fuerit interpunctionis
 usus. Qui usus quantus fuerit in universum ut digno-
 scatur, eas inscriptiones conferam, quae omnino exhi-
 bent interpunctionis signa. Et in IGA. quidem ex in-
 scriptionibus numero sexcentas multo superantibus quin-
 quaginta septem interpungunt, h. e. vix duodecima pars.
 Sunt hae: IGA. 2. 5. 29. 37. 39. 41. 42. 43a. 44a. 47.
 54. 64. 68. 110. 111. 113. 119. 122. 157. 165. 321. 322.
 323. 342. 349. 354. 359. 372 (, 19. 56. 113. 348). 381.
 396. 397. 449. 471. 478. 479. 480. 492. 495. 497. 498.
 499. 502. 504. 509. 511. 530. 544. 546. 552. 562. 563.
 567. 578. 586.

Sane mera haec enumeratio non multum prodest,

nam non ita paucae illius libri inscriptiones sunt tam breves et exiguae, ut interpungere omnino vix potuerint, quae nihil valent ad interpunctionis usum statuendum. Singulas igitur videamus. Atque mirum est, antiquissimas quasque inscriptiones interpunctione prorsus vacare. Has intellego inscriptiones: Atticam illam vetustissimam (Mitt. VI, 107 = IIGA. XXXI, 1), quae ante receptam litterae λ formam Chalcidicam et sinistrorsum scripta est; Psammatichi mercenariorum inscriptiones ad Abu Simbel lapidi incisas; Eleorum titulorum omnium antiquissimum, quippe qui *βουστροφηδὸν* solus scriptus sit (IGA. 109); Theraeos omnes duobus exceptis (IGA. 449 et 471); Amorginos, Melios, Delios, Phoceos. Num possumus facere tanta exemplorum copia quasi obruti, quin ita statuamus, fuisse tempus, quo nondum in usum recepta esset interpunctio, posteo eam seu aliunde traditam seu a Graecis ipsis inventam esse? Quam quaestionem absolvere aut probabiliter diiudicare hoc loco nondum licere cum mihi persuaserim, hic eam protulisse satis habeo. Ceterum non prorsus in antiquioribus inscriptionibus desiderari interpunctionem ut intellegatur, nonnullas afferam quae aut sinistrorsum aut *βουστροφηδὸν* compositae sunt et interpunctione utuntur: Ex Theraeis duas (IGA. 449 et 471); Cretenses IGA. 478. 479. 480; Sigeensem (492), Corcyraeam (342), Atticas (IIGA. XXXI, 2 et 3). Neque ab re esse videtur, universos eos titulos accuratius inspicere, qui aliqua constantia interpungunt. Locrensiū laminarum ea, quae aetate superior est (IGA. 321), a Kirchhoffio quinti saeculi parti priori, altera (IGA. 322) parti posteriori ascribitur (Stud. p. 136/137); titulus Eleus (111) ca. Ol. 70 exaratus est (ib. p. 153). Aes Petiliense (IGA. 544) nescio an certae aetati tribui non possit, quamquam *μῦ, σίγμα, ιῶτα* litterarum formam vetustiore exhibet. Ephesius titulus sine dubio si non prior attamen non posterior

est Halicarnassio lapide, etsi Kirchhoffii argumento, qui ex interpunctione maiorem aetatem colligit, hic uti non licere per se ipsum patet. Sigeensis titulus omnium consensu antiquissimus habetur; utrum medio an incipienti saeculo sexto tribuendus sit ad nostram quaestionem nil attinet. Dirae Teiorum inter Ol. 75 et 80 exaratae sunt (Kirchh. Stud. p. 13).

Iam apparet ne ex constanti quidem interpunctionis usu inscriptionis aetatem inter certiores atque artiores fines includi posse. Nam talem usum per duo saecula persequi licet. Sed minime omitti oportet, maximas sine dubio esse illius usus discrepantias in diversorum locorum titulis. Videamus igitur, quantus in singulis locis fuerit usus interpunctionis. Ad hanc rem perficiendam expedit libri illius a Roehlio in scholarum usum editi ordinem sequi, quippe in quo libro tituli ex originis locorum ratione compositi sint, quamquam non omnes in IGA. editos hic repetitos esse sat scio. Desunt enim, ut hoc praemittam, ex inscriptionibus interpunctione utentibus hae duodeviginti: Argivus titulus 44a; Laconicus 64; Eleus 122; Styrenses 372 (, 56. 113. 348); Cei 396. 397; Theraeus 471; Cretenses 478. 479; Acrensis 511; reliqui: 552. 562. 563. 567. 578. 586 sunt incertorum locorum. Contra IIGA. habent duos novissime repertos: X, 2. 7 et septem Atticas: XXXI, 2. 3. 14. 16. 18. 21. 23, qui in IGA non inveniuntur.

In IIGA igitur interpunctione utuntur:

ex 19 titulis Theraeis unus: I, 10.

ex 4 Creticis unus: II, 4.

ex 3 Euboicis praeter Chalc. unus: IV, 2b.

ex 18 Chalcidicis unus: V, 11.

ex 68 Boeotiis duo: VI, 50, 53.

3 tituli Locronum Ozol. omnes: IX, 1. 2. 3.

ex 9 Thessalicis duo: X, 2. 7.

ex 32 Laconicis unus vel duo: XI, 5. 30 (?).

- ex 2 Hermioneis alter: XIII, 2.
 ex 19 Eleis quattuor: XIV, 2. 3. 6. 16.
 ex 11 Achaicis unus: XV, 10.
 ex 2 Aeolicis alter: XVI, 2.
 ex 37 Ionicis octo: XVII, 8. 9. 10. 11. 14d. 32. 36. 37.
 ex 16 Argivis quinque: XXIV, 6. 8. 10. 11. 12.
 ex 21 Corinthiis duo: XXV, 12. 20.
 Mycenaeus: XXVIII.
 ex 8 Aegineticis duo: XXX, 3. 6.
 ex 24 Atticis novem: XXXI, 2. 3. 12. 14. 16. 18. 21.
 23. 24.

Accedit alter e 2 titulis incertae originis.

In summa ex 298 titulis huius libri interpungunt 48,
 i. e. fere sexta pars.

Omnino vacant interpunctione tituli Melii (III et XVIII), Locrorum Opuntiorum (VII), Phocei (VIII), Arcadici (XII), Parii (XIX), Siphnius (XX), Thasii (XXI), Naxii (XXII), Cei (XXIII, sed cf. IGA. 396. 397), Sicyonii (XXVI), Phliasii (XXVII) Megarici (XXIX).

Imprimis, ut videmus, Aegaei maris insulae tenuem interpunctionis usum exhibent: Thera, Euboea, Melus, Parus, Siphnus, Thasus et si Asiae Ionicae titulos singulos inspexerimus, Samum quoque, Amorgum, Miletum huc pertinere videbimus. Quare in universum sane licet dicere, illorum locorum lapicidas aut non recepissee, aut iam non frequenter usurpare interpunctionem. Horum igitur locorum si nova reperta inscriptio constanter interpungit, non vetamur eam antiquissimam putare: sed aetati hoc modo definitae ne nimis magnam fidem habeamus neve ex ea alia colligamus semper erit cavendum. Nam negari non potest, in quibusdam saltem ex illis quas dixi regionibus fortasse casu factum esse, ut adhuc rarum interpunctionis usum exhibeant. Valde probabile videtur Ionicos, qui cum aliis rebus tum scripturae perfectione antecesserunt ceteras gentes, interpunctionem

quoque primos abiecisse. Sed certum aetatis definiendae vel originis statuendae indicium ex interpunctionis usu vix unquam adipisci licebit. Ergo totius huius enumerationis fructus haud ita magnus est, nisi id operare pretium esse censeamus, didicisse non posse quidquam certi statui ex sola interpunctione. Unum concedendum est, constantem interpunctionis usum esse indicium aliquius antiquitatis, sed eiusmodi antiquitatis titulum, quamquam quarti saeculi esse veri simile non est, et quinto et sexto saeculo tribuere licet, et meo iudicio ne superiori quidem saeculo ascribere vetamur.

Adhuc Atticas inscriptiones vix attigi, et iure quidem, cum constans interpungendi usus in titulo Attico, quantum scio, nullo occurrat, excepto Sigeensi titulo, quem supra tractavi. Fere idem igitur atque de Ionicis titulis de Atticis dici potest, sed Atticae inscriptiones tamen aliquam interpunctionem, quamvis tenuem atque inconstantem, diu retinuerunt. In CIA. I fere quinta pars omnium interpungit, in CIA. II, 1 vicesima quinta pars, at in CIA. II, 2 fere quarta pars! Numeros illos meros si compararemus, facile possemus in eum errorem induci ut magis magisque crescere interpunctionis frequentiam arbitraremur annis labentibus. Quare rursus admonendum est, Atticarum inscriptionum saeculo quinto recentiorum interpunctionem, quamquam non nunquam voces distinguat, in universum adhiberi ad numeralia sigla et ad compendia verborum indicanda. In vetustioribus inscriptionibus eadem inconstantia atque licentia occurrit, quae in ceteris inscriptionibus Graecis. Cuius inconstantiae unum imprimis manifestum exemplum affere mihi liceat, priusquam huius alterius capitis finem faciam.

Inscriptiones CIA. I, 117—175 continent traditiones rerum sacrarum Minervae Poliadis in Pronao, Hecatompedo, Parthenone asservatarum. Quae documenta quam-

vis sint mutilata, tamen habemus ex nonnullis annis omnium trium aut certe duorum locorum catalogos, quos initio anni insequentis a quaestorum superioris anni scriba compositos esse constat; omnium trium locorum catalogi igitur, ut consentaneum est, eiusdem scribae nomen in praescriptis exhibent.

Anno Ol. 87, 1 quaestorum scriba fuit Ἀπολλόδωρος Κριτίου Ἀγιδναῖος, cuius nomen, licet plus minusve de-
curtatum, in Pronai traditionibus CIA. 119 v. 2 et 120 v. 4, in Hecatompedi traditione CIA. 142 b v. 2, in Parthenonis traditionibus CIA. 162 v. 3 et 163 v. 25 scriptum legitur. Hic igitur scriba quaestorum iussu anni Ol. 87, 1 triplicem catalogum composuit et lapidibus incidendum curavit. Quorum trium catalogorum fragmenta exstant CIA. 119. 143. 162. Quae interpunctionis usu ita inter se differunt, ut 119 et 162 interpunctione vacent, 143 certe ter ternis utatur punctis (v. 10 et 12) ad numeralia signa appositis. Consequens ergo est, quoniam unum scribam vel unum lapicidam eodem tempore eadem in re partim interpunctionem posuisse partim omisisse credibile non est, ut pluribus inter se diversis lapicidis diversorum locorum traditiones incidendas locatas esse vel locari solitas esse censeamus; nam illud exemplum non singulare est, immo eadem ratio occurrit in traditionibus anni Ol. 89, 3 ubi Hecatompedi traditio (CIA. 153) interpunctione vacat, Parthenonis (CIA. 170) constanter utitur, et anni Ol. 90, 1 ubi Hecatompedi et Parthenonis titulus uterque quidem interpunctionem adhibet, sed ita, ut ille binis, hic ternis punctis utatur. Pronai utriusque anni titulus servatus non est. Quadratarius igitur scribae interpunctionis nullam habebat rationem, sed suae quisque consuetudini atque usui obsequens distinctionis signa aut addebat aut omittebat. Manifesto apparet, quam non legi ulli interpunctionis usus subiectus fuerit. Ceterum quod unius

templi, unius quaestorum collegii documenta, ab uno scriba composita, compluribus lapicidis insculpenda locabantur, si mirum videatur, hoc aliquo modo comparari licet cum triplici illo ordine in trium cubicolorum tabulis conficiendis adhibito, quem ordinem Kirchhoffius accurate demonstravit atque enarravit CIA. p. 64.

Haec fere de interpunctionis usu dicenda esse mihi videbantur.

CAPUT III.

De historia interpunctionis.

Quoniam qualis et quantus fuerit apud Graecos ipsos interpunctionis usus satis me exposuisse spero, hoc ultimo capite in historiam illius interpunctionis inquirere conabor: et duo quidem imprimis statuenda erunt: quae origo Graecae interpunctionis fuerit, et quantum ipsa Graecorum interpunctio valuerit ad aliarum gentium interpungendi usum.

Si de origine Graecae interpunctionis quaeritur, omnino duo fieri potuisse quivis concedet: aut ipsi Graeci eam invenerunt aut ab aliis traditam acceperunt. Quod prius posui verum aut veri simile esse mihi quidem non videtur. Nam eos, qui invenerint interpunctionem scilicet ad scripturae perspicuitatem sublevandam, ipsos tanta inconstantia eam adhibuisse credibile nullo modo est. Si nullo loco, nulla aetate plene atque constanter interpunxisse eos videmus, ad quem tandem finem quaeso tale aliquid ipsos invenisse censeamus? Iam quonam modo Graeci soliti sint eis quas ipsi excogitaverunt rebus uti age videamus. Constat Graecos Phoenicum alphabeto nonnullas litteras addidisse, quasdam Phoenicias litteras nova vi atque significatione instru-

xisse, scripturam primo Phoenicum more sinistrorsum duxisse, mox *βουσιτροσηδόν*, postremo dextrorsum scripsisse, litterarum denique formam venustiore et elegantiore fecisse: in his igitur et aliis rebus ubi nam est aliqua eiusmodi inconstantia, quae comparari possit cum ea, quam ubique in interpunctione adhibenda conspicimus? Immo in illis rebus, quamquam per gradus quasi procedere atque progredi non desierunt, tanta constantia Graeci usi sunt, ut ex illarum statu certissima aetatis et originis indicia parari possint. Ergo Graecos ipsos interpunctionem invenisse veri simile mihi non videtur. Consequens est, ut aliunde eam acceperint. Unde acceperint, coniectura sola fortasse assequi possemus, etsi certis argumentis careremus. Nam facile conicere licet eos, qui litteris uti Graecos docuerint, interpunctionis quoque usum eis tradidisse. Qam coniecturam veram esse Phoeniciae et Graecae interpunctionis similitudine comprobatur.

De Phoenicia igitur interpunctione nonnulla verba facienda sunt. Egit de ea Gesenius (*Scripturae linguae Phoen. monum.* Lips. 1837. p. 54/55), sed quae tum recte dicta esse videbantur, non iam recta sunt, postquam cum alii tituli Phoenicii antiquiores tum vero Mesae, Moabitici regis, monumentum triumphale inventum est, quod Phoeniciae sive Moabiticae scripturae noni saeculi specimen exhibet. Titulum triginta quatuor versus licet mutilatos continentem edidit et res ad ephigraphicam spectantes illustravit Clermont-Ganneau (*Revue archéol.* 1870. t. XXI. p. 183 tab. VIII), cuius de tituli interpunctione verba integra afferro (l. l. p. 204): „Un fait extrêmement intéressant qui nous est révélé par cette inscription, c'est que la division des mots et la séparation des phrases par des signes de ponctuation était pratiquée dès la plus haute antiquité . . . jamais . . . on n'avait rencontré un système aussi absolu

et aussi précis. Tous les mots, sans exception (!), sont séparés par des points, et le texte lui-même est coupé en véritables versets par des barres perpendiculaires“ etc. Quae quamquam in universum recte dicta esse nullo negotio perspicitur, tamen illam rem ea qua par est cura ac diligentia me ob linguae Phoeniciae imperitiam examinare non posse valde doleo. Id vero ego quoque cognoscere mihi visus sum, de interpunctionis illius summa constantia („sans exception“) quae ille vir doctus professus est, non premenda neque ad verbum accipienda esse: nam collata tituli partis alicuius transcriptione et versione quadam inveni saepius plura vocabula interpunctionis signo non separari, neque solum eius modi vocabula, quae in Semiticis linguis artius coalescere solent. Apud alios doctos viros de hoc titulo disserentibus nihil inveni de interpunctione eius, nisi quod Schlottmannus („Die Siegestsäule Mesa's. Halle 1870“ p. 50) in universum dicit: „Palaeographisch wichtig ist in einer so alten Inschrift die sich dort findende Sonderung der Worte durch Punkte und der Sätze durch senkrechte Striche.“ Sed utut haec res se habet, satis magnam esse illius tituli interpunctionis constantiam concedere licet. Habemus igitur in hoc vetustissimo lapide duplicem interpungendi rationem, alteram, qua voces punctis alteram qua sententiae („les versets“) hastis directis distinctae sunt. Quae duplex ratio in Graeca inscriptione adhuc non inventa est neque unquam invenietur, ut conicere licet: tamen continuo conspicitur mira quaedam illius interpunctionis et rationis et signorum cum Graeca interpunctione similitudo, nam utrumque signorum genus, et hastas et puncta in Graecis titulis invenimus. Quae similitudo nisi ex aliqua utriusque interpunctionis cognatione explicari non potest. Et memores, alphabetum Graecum a Phoenicibus originem ducere, non iam dubitabimus

colligere Graecos interpunctionem quoque et una quidem cum alphabeto a Phoenicibus accepisse. Sane potest contra hanc sententiam dici, veri simile non esse iam tum cum litteras acciperent interpunctionem eos adoptavisse, quia opus fuerit aliqua scribendi exercitatione priusquam singulas orationis voces discernere et in scriptura interpunctione distinguere didicerint: probabilius esse primo interpunctione prorsus eos caruisse, postea nescio quo tempore eam in usum recepissee: id quod fortasse comprobetur eo, quod vetustissimi quique tituli non distinguant. Haec minus recte dicta essent. Sane concedo aliqua exercitatione atque usu eos indigere, qui singulas voces in scribendo discernere student, sed tantam exercitationem antecessisse nullo modo vetamur arbitrari, cum ipsius alphabeti traditionem non brevi tempore factam esse, immo per longum temporis spatium durasse consentaneum sit. Licet etiam nobis conicere, aliquot saecula eam viguisse, quae tempora tamen multo priora sunt ea aetate, qua vetustissimi nostri tituli scripti sunt. Horum titulorum aetate, cum tam multa et tanta mutavissent Graeci in scriptura, ita ut ipsorum ingenio atque indoli prorsus adaptata atque accommodata esset, ea aetate cum sine dubio Phoeniciae originis suam scripturam esse vix sentirent, ea aetate a Phoenicibus de integro aliquid mutuum sumpsisse censeamus? et ad eum finem sumpsisse ut maxima inconstantia usurparent? Immo ita fere illa res explicari posse mihi videtur: Graeci interpunctionem, qua Phoenices constanter utentes videbant, quasi inscientes vel inviti una cum litterarum formis receperunt, mox pro re inutili atque supervacanea et luxuriae causa apposita habere coeperunt, sive ob legendi peritiam atque usum tale legendi subsidium non desiderabant, id quod de antiquissimis illis temporibus dici vix potest, sive interpunctionis propriam vim atque utilitatem non satis intellegebant. Quod non admodum

mirum videbitur, si meminerimus eosdem Graecos, qui in artibus, litteris, aliis rebus praeter ceteros floruerint, in rebus ad vitae commoditatem inventis, in rebus „technicis“, si ita dicere mihi licet, saepe aliis inferiores fuisse et ad ea quae aliunde acceperunt tradita fere nihil addidisse, quia in universum singulare eorum ingenium ita ferret, ut in omnibus rebus non tam id quod utile et commodum quam quod pulchrum esset atque venustum quaererent atque curarent. Eodem igitur modo interpunctionem rem levidensem et non necessariam esse rati magis magisque neglexerunt et abiecerunt. Sed cur eam, ubi supervacaneam esse eam sentire coeperunt, non statim omnino abiecerunt? Hoc fieri non potuit, nam, ut dicunt, „natura non fit per saltus“ et Graeci imprimis quanta cum pietate ea quae nulla alia re nisi traditione atque antiquitate sancita essent, etiamsi non modo non usui, sed impedimento essent, ea retinuerint quis est quin ex Graecae artis historia satis didicerit?

Hac fere ratione mira illa in interpunctionis usu inconstantia probabiliter explicari mihi videtur.

Quoniam de Phoenicum et Graecorum interpunctionis similitudine locutus sum, de discrepantia quoque dicere par est. Antequam hoc faciam, admonendum videtur, nos unum illum Mesae lapidem habere, ex quo antiqua Phoenicum scriptura et interpunctio cognosci possit, et eum ipsum aetatis multo inferioris esse ea, qua cum alphabeto interpunctionem a Phoenicibus Graecos accepisse inter viros doctos convenit. Mesae igitur lapis sententiarum distinctionem habet, qualem a Graecorum more prorsus alienam esse supra exposui. Sed ex eis quae paullo ante disserui duplicem illam interpungendi rationem apud Graecos non occurrere mirum iam non est. Signum quidem illius sententiarum distinctionis apud Phoenices usitatae, si quidem licet ex unius Mesae lapidis usu aliquid colligere de universo

Phoenicum usu interpunctionis, ab his receperunt quaedam Graeciae regiones, imprimis Creta insula. At punctum simplex non invenitur apud Graecos! Quam signorum discrepantiam cum primo censuerim maximi esse momenti, nunc aliter sentio, quia idem redit in Italicis inscriptionibus. Semper attendendum est, neque ad Phoeniciam neque ad Graecam interpunctionem antiquissimam prorsus cognoscendam materiae copiam adhuc sufficere. Quare satis habeo quae fieri potuerint exponere. Aut simplex punctum solum a Phoenicibus acceperunt Graeci et pro illo nescio quibus rationibus ducti duplex vel triplex punctum adhibere maluerunt; aut Phoenices et uno et duobus et tribus punctis distinguebant, quas tres signorum formas aeque Graeci adoptaverunt, et mero casu factum est, ut simplex punctum in titulis proprie Graecis adhuc exaratum non videamus. Utrum veri similis sit, vix audeo diiudicare, tamen non omittam admonere in Phoeniciis inscriptionibus prioris aetatis, quamvis simplex punctum frequentissimum sit, tamen bina saltem puncta nonnunquam legi (cf. Corp. inscr. Semit. t. XI, nr. 6. 14. 15. 23). Hancne interpunctionem Phoenicum lapicidam a Graeco mutuamsumpsisse censeamus?

Si alphabeti Graeci historia duce Phoenices interpunctionis Graecae auctores fuisse coniecimus eamque coniecturam veram esse ex interpunctionum similitudine probavimus, consentaneum erit nos eadem via id quaerere aliae gentes a Graecis traditam interpunctionem acceperint. Cum igitur Italicorum titulorum litteraturam a Graeca derivatam esse constet, idemne de eorum interpunctione dici possit iam videamus. De Italicarum inscriptionum interpunctione egit Fabretti (Corp. inscr. Ital. suppl. § 147 sqq. = p. 221 sqq.), ita tamen ut eius ordinem hic sequi ex re non sit. Plurimi sunt tituli Italici in adhibendo simplici puncto, quod signum ubi

que occurrit. Sed bina quoque puncta non ita raro exarata sunt: in titulis Italiae Superioris, Etruriae, Umbriae, Volscorum Marsorumque finium, Campaniae, Samnii, et terna: in titulis Italiae Superioris, Etruriae, Picenorum, Volscorum, Campaniae, Samnii. Latinos quidem nisi per singula puncta non interpungere notissimum est; quamquam eorum inscriptiones adhuc exstantes non satis magnae antiquitatis sunt.

Usus Italicae interpunctionis plane idem est atque in Graecis antiquissimis titulis, nisi quod in universum multo maiore constantia utitur, ubicunque omnino interpunctio adhibetur; nam inveniuntur quoque tituli qui prorsus ea careant. Quonam modo frequentem illum simplicis puncti usum explicemus? Quod signum in Graecis titulis vix exstare, in Phoeniciis vulgare esse si meminerimus, nonne luce clarius erit a Phoenicibus recta via accepisse Italicos interpunctionem? Quod quominus verum esse arbitremur duabus rebus impedimur: primum enim constat alphabetum Italicis traditum esse a Graecis; an quisquam putat ab alteris litterarum formas, interpunctionem ab alteris eos accepisse? Tum vero eiusmodi commercium inter Phoenices et Italicos ante Graecorum adventum fuisse nulla sunt vestigia quibus demonstretur (cf. Mommsen, *Hist. Rom.* I⁷ p. 127). Ergo cogimur ex duobus alterum eligere, aut Italicos a Graecis simplex quoque punctum accepisse, aut ipsos illud signum excogitasse. Hoc cur fecerint caussa intellegi nullo modo potest; illud eam difficultatem habet, quod Graeci tituli abhorrent a simplici puncto. Sed non novimus satis accurate Graecorum aut certe Chalcidensium antiquissimam interpunctionis formam. Memores velim simus ex Chalcidicis titulis unum interpunctione aliqua uti et illum unum ex duobus verbis constare (IGA. 530).

Diuidicare igitur illam quaestionem materia non

sufficiente vetamur. Nam ex tribus vel duobus illis titulis, qui per simplex punctum distinguunt (IGA. 509. 544. 546), colligi quicquam vix potest, cum ego quoque concedam fieri potuisse, ut hi Italicam interpunctionem imitarentur, licet ab ipsorum sua alienam. Vel una inscriptio Graeca in ipsa Graecia reperta indidemque oriunda illam rem adhuc dubitationis tenebris obscuratam clara luce illuminare poterit, si quidem aliqua constantia simplici puncto usa Graecis illam interpunctionem non ignoratam esse docuerit.

Quoniam ad calcem tota haec disputatiuncula decurrit, ea quae singula singulis locis aut certis argumentis probasse ac demonstrasse aut plus minusve probabiliter coniecisse mihi videor, hoc loco breviter comprehendere liceat.

Distinctionem verborum Phoenices invenerunt et constanter praeter sententiarum distinctionem adhibuerunt. Illam Graeci una cum litterarum usu traditam a Phoenicibus acceperunt, hanc non item. Fiebat illa interpunctio apud Phoenices per simplex punctum, fortasse etiam per duplex et triplex punctum. Conicere licet, Graecos omnes illas tres formas recepisse: Chalcidenses saltem simplex quoque punctum usurpavisse tantum probari non potest. Antiquissimis illis temporibus, quibus Graeci interpunctionem Italicis nationibus per commercium tradere coeperunt, ex harum nationum constantiore usu Graecorum quoque usum constantiorem fuisse colligere licet. Postea sive interpunctionis utilitatem non recte aestimabant, sive tali legendi subsidio non admodum indigebant, ita ut eam quasi onus molestum ab aliis sibi impositum et rem supervacaneam esse sentirent, magis magisque neglexerunt, sero autem

prorsus abiecerunt et diversis quidem locis ac diverso tempore, ut videtur, ita ut Ionici tituli primi interpunctione careant. Sed tanta in singulis titulis inconstantia est interpunctionis, ut ex ea aetatis vel originis certiora indicia effici vix possint.

Quae interpunctionis forma a Phoenicibus ad sententias distinguendas adhibita est, hasta directa, ea apud quosdam Graecos recepta est in usum, sed eadem vi atque significatione qua apud ceteros puncta, h. e. ad voces separandas usurpata est.

VITA.

Natus sum Rudolfus Kaiser Posnaniensis Rawicii die XVII. m. Julii a. 1862 patre Ewaldo superintendente, matre Mathilda e gente Geist, adhuc viventibus. Fidei addictus sum evangelicae.

Primis litterarum elementis imbutus vere a. 1871 in gymnasium reale, quod vocant, oppidi patrii receptus sum. Vere a. 1880 ut humaniorum studiorum facultatem mihi pararem gymnasium Krotoschiniense adii. Maturitatis testimonium adeptus vere a. 1882 Berolinum me contuli, ubi per octies sex menses studiis philologicis operam navavi. Docuerunt me viri doctissimi: Curtius, Diels, Dilthey, H. Droysen, Feller, Hirschfeld, Hübner, Kiepert, A. Kirchhoff, Paulsen, Robert, Roediger, Scherer, Schmidt, Spitta, Tobler, de Treitschke, Vahlen, Wattenbach, Zeller. Ad exercitationes suas me admiserunt: H. Droysen, Feller, Hirschfeld, Hübner, Kirchhoff, Paulsen, Robert, Roediger, Scherer, Vahlen. Quibus viris cum omnibus iustas ac debitas ago gratias, tum imprimis ei, qui benigne opusculum meum suo consilio adiuvit et non indignum esse censuit, quod animi mei in eum gratissimi esset documentum.

Sententiae controversae.

I.

E librorum scriptura interpunctio apud Graecos sine dubio multo prioribus temporibus prorsus disparuit, quam ex inscriptionibus.

II.

Apud Terentium in iis versibus, qui secundum traditam lectionem in particulas sive praepositiones exeunt, non est quod offendamus.

III.

In Terenti Andriae v. 11 sine dubio corrupto Bentlei coniectura omnium adhuc maxime probabilis esse mihi videtur.

IV.

In Terenti Adelphorum v. 4 et Heautontimorumeni v. 848 a codice Bembino traditis metrum corruptum non est.

V.

Bentleium plus errando quam emendando profuisse Terentio censeo.

VI.

In Suetoni vita Terenti (p. 5 v. 7 ed. Fleckeis.) cum libris manu scriptis legendum est:

„nondum quintum atque vicesimum egressum“ e. q. s.

UNIVERSITY OF ILLINOIS-URBANA

481.7K123D

C001

DE INSCRIPTIONUM GRAECARUM INTERPUNCTION



3 0112 023618462